

龍山縣志卷之十六

藝文

龍山當蠻土竊據之時人翫兵爭風趣謏陋故文籍未有聞也我

朝雅化遐覃南方學者各起名家踵方屈宋而宰臨其地者復多韓柳之儔搜爬遺佚工於綴敘故書文之所通被雖地偏區遠固無有獸居鳥語者矣居今之地徵獻考文迴泝疇曩雅陋殊科矣爰輯其篇章列於志邑之風土民情政治具焉用以備輶軒者之采

龍山縣志

卷之十六

一

重修學宮記

善化人
御史 賀熙齡
號農 柘

郡縣之有

聖廟由來久矣龍山爲湖南西北僻邑我

朝雍正七年知縣袁振緒創建之嗣乾隆甲午歲知縣秦人藩復重加修葺至

今天子甲午之歲歲紀蓋一周矣而祠廡頽落不振噉炙雷注維幽草之是叢虫鼠之是娛邑人士愀然懼無以康吾夫子之靈者丹徒嚴君學淦適令是邑倡議重修邑紳黃君大鉞奉其先人遺命獨身任其事不假貲

於他人諸建置一如舊制維增建後廡及鐘鼓樓禮樂房庫並節孝祠東西齋宿所又特建奎文閣以貯賜書凡夫采棟樑桷楹礎之屬儉不失制華不崇巧土木之勞閱二十六月而訖黃君殆古稱勇於爲義者與旣落成請余紀其實於石余維夫子之教自周秦以來蓋二千有餘歲迄於今惟環海而西諸番彝尙沉溺陷沒於佛釋之說諸如中九州及海東諸國衣冠禮樂之族詔朔遙暨之區則莫不翕然尊其行而服其教誦其書而崇其宮日月不廢人心不絕其可知也抑余又思

學宮之設無地無之稽之會典月朔郡縣長吏率各僚貳具牲告廟二丁大祭又召集學官弟子襄祀事焉典至重也第不知此奔走鐘鼓玉帛之人其亦有志聖人之志學聖人之學而其誠足交於聖人焉否也不然徒崇飾夫子之居以時享祭謂遂足以自見於夫子而夫子之靈其必陟降在茲余又未之能信也龍山風俗敦樸人文蔚起黃君先大父鴻禛公以孝義舉於鄉而黃君今又能以孝義風其鄉人其必奮然興起思慰吾夫子屬願來學之意者願與黃君及邑人士卒勉之矣是

爲記

重修學宮記

廣東南海人
蔡錦泉
號春帆
湖南學政

龍山學

文廟以甲午夏鳩工重建越二歲餘落成余適按試溪州學官以序請余細審顛末知是役也邑人黃廣文大鉞捐金萬餘獨任其事余深異之學師曰廣文父久有是志大鉞此舉成先志也余聞而肅然作曰有是哉其所以妥我

夫子之靈者殆不在巍峩赫奕之觀而在廣文之孝也

龍山縣志

卷之十六 文

三

歟夫

國家設學以教士也士有百行莫重於孝孝有百行莫大於先意承志廣文父能矢是志廣文能成是志又豈尋常作堂肯構者所可同日語哉然則破除鄙吝見義必爲世所謂難能而可貴者以之律廣文皆其善之小焉者耳余未與廣文晤而直以孝信其爲人其里居必能講讓而型仁其司鐸必能果行而育德其貽謀必以忠厚永其奕禩必以科第昌廣文固不敢責報於孝而積善餘慶理固然也龍山與永順保靖桑植同屬溪州

邑有是舉則鄰聞風而觀感者必當有人且傳播他郡
欣慕而則效者必更有人郡邑相率而化油油然崇孝
弟忠信而戒涼薄重禮義廉耻而輕資財道路橋梁之
廢靡不修鰥寡孤獨之窮靡弗恤休哉其所以妥我
夫子之靈者誠不在巍峩赫奕之觀而在是矣余奉
命視學此邦有振興之責所望於士林者良厚茲廣文
已先得我心者他日周歷郡邑必皆有余所樂聞之事
與所樂道之人如廣文者是余之厚幸也其亦此邦之
厚幸也夫至於棟宇之輪奐規模之恢廓與夫度地庀
龍山縣志

卷之十六 文

四

材董事課工之勞勩邑侯記之鄉先生言之而廣文亦
自誌甚悉余可不贅

文昌宮記

湘潭人前訓導 何其燦 字鳳橋

斗魁戴匡六星爲

文昌宮一曰上將二曰次將三曰貴相四曰司命五曰
司中六曰司祿文昌六星在北斗魁前卽魁星也其占
黃潤光明則吉

聖天子承重熙累洽之後尊崇祀典昌明文教自京都
以及直省府州廳縣莫不建立廟宇崇祀

文昌之神春秋二祭皆仿

至聖先師孔子廟儀制拜跪奠獻典至重也龍山自嘉慶丁丑年邑紳捐貲相度擇地於

至聖先師廟右創立廟宇崇祀

帝君遵

國制也正殿前建鉅廳曰明倫堂爲地方官宣講

聖諭講學習禮課士子地重彝常也廳上層檐重閣曰魁星閣供奉

魁星像尊文星也後則仿

龍山縣志

卷之十六

五

至聖廟之

崇聖祠設木主供奉

帝君先代明本源也每年春秋二祭地方官入廟行禮眾紳士亦羅拜於其後雍容冠裳毋敢隕越

帝君神在天下如水在地中庶幾妥侑於斯永歆其祀今歲紳士復捐貲建二亭於正殿後爲入廟者更衣休息之所於是規制具備焉余以菲材責膺訓誡爰進紳士而告之曰諸君崇奉

帝君瞻仰

聖容敬讀

寶訓必學爲端人正士孝子忠臣以仰副

聖天子誕敷文德之盛典若徒修詞章綴科第爲克盡
乃事吾恐非國家興賢育才之心而亦非

明神牖迪斯人之意其各勉之諸生因以記屬余於是
澣手頓首而爲之記

鍾英塔記

黃大鉞

龍山古白巖地也城小而固河水爲池白巖水自東注
二井水自南來復北而會於東施南瀆水自北來逶迤

龍山縣志

卷之十六

文

六

蜿蜒抱郭環繞如帶而皆大滙於城西五老峯下之跳
魚洞以去望氣者謂此地山環水繞霞蔚雲蒸必有魁
傑膚敏之才鍾山水清淑之氣挺生以洩其奇者龍山
自向化以來風俗敦龐人物俊秀講學造士之區規制
燦備而士之得受裁成經明行修者亦卓然多有其人
然自乾隆丙午越嘉慶丙子以迄於今其間由諸生登
賢書者蓋僅有之而捷南宮者則無有豈師儒判賢否
而文行之士不足歟抑氣化區豐嗇而培植之術未盡
也形家者曰龍山山體崩劣絕少文峯水勢雖曲折環

抱有情而出落不甚疏暢科名之寂寥未必非是之故然要未嘗不可以人力培之以補造化之不足如跳魚洞之五老峯陡岸峻嶒崇基聳頂爲邑下游關鎖若建塔以鎮之砥柱江流培毓秀氣實與閭邑文運有關余執是說卽商之晏君體三伯兄東序咸樂有是舉復同請於邑侯易小坪先生而先生亦欣然許之且曰文塔之建無地無之何其不早建也今諸君雅意培植竊願奮勉圖成勿緩厥事卽爲敘引勸諭城鄉捐助經費並錫嘉名曰鍾英塔意謂天地英華藉斯塔以鍾之以大

龍山縣志

卷之十六

文

七

暢乎文治氣化之隆也於是相與籌度經營鳩工興事始於道光丁酉歲十一月越己亥十一月告成計共費錢二千緡爲級七重高九丈五尺周廣九十有六尺每級啟門四玲瓏虛敞其中堦徑層曲折達登者目空千里先是戊戌夏七月二級將告成時大雨傾注旋就坍塌蓋其石匠不良於謀抑非獨雨故也當是時或語予曰初基旣壞經費又甚難繼子可休矣余謝曰有志者事竟成特患志不堅耳堅則未有不成者半途而廢余心安乎於是極力圖成且時懍然有覆轍之慮乃未幾

而亭亭直上者儼若文峯之插霄漢焉然後知此中實有默爲吾宰者予亦幸告無憾夫浮圖昉於釋氏地理出於術家而吾儒讀書稽古豈必沾沾以科第爲榮然人材之盛衰實由氣化之通塞不有以培植而鍾毓之其何以宣鬱積發人文之英耶吾願邑人士之有志於學者日積月累自卑而高不廢半途聿臻其極則自今伊始文運宏開英材軼出將必有登金門上玉堂以蜚騰乎天下者吾請於茲塔卜之是役也吾與晏君體三不過籌捐經費已耳至於自備饗殮勒督工程則里人龍山縣志

卷之十六

八

賈正峯李宏錦張鼎元三人之力居多余旣樂觀厥成又嘉三人之勞不可泯也遂援筆而爲之記石工鍾大鬻姚家緒於此與有勞焉亦不可以不書

他砂里義學記

福建人 林逢年
進士

古之教者家有塾黨有庠術有序國有學家二十五家術遂也於六鄉舉黨六術舉庠則自閭里以上其必有學可知蓋先王作養人材化民善俗教之周且備如此今之爲學其塾庠之遺意歟顧其學有公有私公者官設私者民設要皆與書院相輔而行以廣學校之教也

然官學之費一取諸官久或難繼不如民之自爲籌設
計在經久無虛糜侵牟諸弊故官學不如民學之尤善
龍山他砂里土沃人殷士爭問學歷屆遊庠食餼者幾
與本城里埒道光十七年紳耆等請之官欲於本里捐
建書院義學欽崇

聖教敬祀

文昌旣得請遂鳩貲召匠擇於招頭寨吉土卜日定基
屋宇崇宏垣墉堅厚舉殿屋齋廚與凡器用備具工方
竣而所募之若干緡告罄塾師之束修生童之膏火尙
龍山縣志

卷之十六 文

九

有待也今年紳耆等復集同志慨然議行續勸得錢若
干千先興義學畫
文昌宮前進爲學所奉

先師牌位於其上延師集徒眾早晚督課誠盛舉哉顧
或疑之謂

先聖至尊至大祀之於鄉得毋褻且非制曰是不然禮
惟天子諸侯有三社大夫以下雖不得專社然亦可成
羣置社故有州社里社又有市社皆以祭地示也特其
禮文隆殺有差等焉耳

聖人德參造化神之靈無乎不格猶地之載無乎不周
作之主朝夕事之蓋藉以生其嚴畏砥礪厥躬匪但食
其德不忘所由來以云報也則於鄉市何嫌今富家建
塾皆供奉

聖牌以昭誠敬未有疵其不可者而獨於此疑之且
文昌宮何爲而獨可建哉是固不足以難之也夫人亦
知善自爲而已其强有力者多半勤苦起家絲毫不妄
用間有賢者或亦各有事未遑他顧乃不憚奔走開導
咸願出所有爲里中子弟計之深慮之遠此豈第望其
龍山縣志

卷之十六

文

十

博一第一官以爲榮哉誠期其遜志時敏力求上達得
志則舉而措之上不負君下不負民以副
國家作人成俗之至意不得志則束身自重爲教於鄉
俾入事父兄出事長上無或不道不法獨爲

盛世匪民是不徒倡始諸公之至願也毋曰偏隅四方
觀法毋曰十室忠信不誣尙其勉之哉學旣建欲舉所
設刊諸石永久勿壞託友人黃伯海命爲一言不獲辭
書此以應聞伯海尊人生時常懷此願伯海以爲未逮
積憾至今噫是皆畱意於人才風俗儻所謂古君子之

用心非耶

義倉引

黃一清

從來風俗之升降因夫人心之淳澆其降也有敗之者
斯其升也抑唯數奇人傑士幹旋於其間耳方今人心
風俗亦畧可覩矣然而猶可爲也爲之奈何莫若使民
無凍餒古者食之以時用之以禮耕三則餘一耕九則
餘三積三十年而有九年之蓄雖遇水旱蟲蝗而民安
如堵無煩

聖天子下蠲租之詔播賑粟之恩則積貯所賴誠非細

龍山縣志

卷之十六 文

十一

也居今日而策治安惟義倉乃古今通行無弊者耳如
我龍邑山多田少土瘠民貧有田之家大半佃於疲苦
編氓力田者又大半傭躬耕種春夏耘耨無資則貸於
有錢之家爲之貸者大都市儉射利之徒每市錢八百
文勒取新穀或一石或八斗不等是卽時和年豐而連
耒聲息依然室如懸磬更可憫者風俗日趨繁靡鄉曲
小民不知食時用禮之謂何凡一切冠昏喪祭賓客之
費靡不窮奢極欲竭終歲之入不足以償一日淫侈之
用一旦天災流行安得不束手待斃乎慨自井田法廢

小民資生之計日薄後世均田限田率寢格難行偶遇災祲卽截漕發帑無論官吏乾沒與否大半已困極難甦散四方而轉溝壑有由然也爲今之計莫若及有餘之時預爲不足之備諺有之曰積穀防饑信然顧積非藏之於官藏之於民非藏之於一室一家之私藏之於同鄉共井之公倣朱子社倉遺意春放秋收三分取息三年之外二分取息九年之外並不取息每石但取耗穀八升又必維持以官法而不假手於胥吏如此足以備荒然朱子必請假於府此則減殷實之羨餘爲里閭

之保障如黃蜂采花無損於花蜜熟而利歸生人如春蠶作繭弗藉於繭絲成而衣被羣生其操術甚拘其爲利甚溥矣且夫上年來吾邑收成未必至大歉蓋藏之家亦且紅朽滿困四五月間偶因鄰邑之搬運遠郡之就食本地之生聚嗷嗷待哺穀價忽而騰長私售者如居奇貨他郡轉便取攜多藏者若懷毒酺竭澤以圖安靖數年之蓄遂一朝告罄從可知散貯民間無出入之經制雖多亦易盡也當斯城鄉飢民毀廬室斬蒿蕨犬豕牛羊殺戮殆盡釜甑衣物典賣無存甚則拋妻割子

與人爲僕妾易取升斗苟延旦夕不旋踵沓然僵臥草澤市井道路中生者庚癸欲呼死者骸骨相籍斯時無賢不肖疇不怵目而驚心焉又况深谷藜菁之處類多囑匪蟠踞勾煽無賴饑民乘勢搶奪其情狀有不堪枚舉者時事如此仁人君子亦唯補救於萬一耳夫張皇於成災之日與經畫於無事之時其施力有難易獲效亦有淺深因淺圖深何如因難就易故歲饑則擔石難捐時平則指困倡義在小民狃於治安常時談此非以爲迂闊過慮卽以爲牽制難行今卽困極初伸之時人

龍山縣志

卷之十六

文

十三

懷思患預防之志因時利導正不乏有心人也近聞附里正南埧二三君子就彼處早年遺規振作而恢擴之建置義倉聯保甲而人心風俗煥然一新何羨如之矧某等聚族而居者爲首善地乎茲因同志數人籌緩急變通之宜定長久深遠之計值此年穀順成惟冀里社長者隨力捐輸下戶或一二斗中戶或三五石有餘力之家不爲限量以外更有關心世道者無穀可輸卽助錢一二串夫豈曰小補之哉至如何擇地建倉歲中選光明公正之人清管鑰司出納他如緊團練編保甲古

人自有成法邑宰更有明示因時制宜酌行固有日矣以端風俗以正人心莫此義助爲先是爲引

恭建

嘉定人前
永順知府張修府號東

萬壽行宮記

谿州在萬山箐薄中地遐且避於楚南爲極邊

國朝雍正初改流設郡風教所被從古侏儻荒陋之俗湔滌殆盡而龍山人士尤知大義敦善行鄉曲之氓皆愿樸畏法勤於力田一旦會有事變相率執干戈急公難忘勞而致其命固其性天然歟蓋

龍山縣志

卷之十六

文

十四

重熙厚澤涵煦感發之深也直省郡縣例設

萬壽行宮爲

慶典令節朝賀之所月吉宣講

聖諭則讀法遺意龍邑闕焉父老子弟瞻戀雲日未獲遂其悃忱者百餘年而縣署側有五通祠蠹胥猾役窟其中以毒痛吾民久矣同治二年秋修府以督防至極投神像火中察胥若役之黠而魁者將盡懲之祠故奢麗倍恆制邑人黃一澧等請卽其地恭建

行宮鳩工庀材咸奮躍從事夏生建寅願輸資佐其役

修府爲一再白行臺省以杜沮撓者是冬移攝長沙迂道重經邑城則巍然煥然規制已備率屬官紳耆式序成禮焉越明年冬工始竣循故事由縣牘詳而邑人書來請刻石之文又明年秋乃克爲之記嗚噓人心風俗之患至今日烈矣自愚民溺於邪慝結黨譁張寢釀爲羣盜海宇騷然蓋踰一紀至窮島醜類益恣肆其誕妄不經之言簧鼓蔓衍而不可究夫豈眞民之無良與風會之不古若哉譬之養苗然厚培其本根而力去其蝨賊在司牧者任之而已修府守郡三載龍邑再被寇憑

國寵靈亦賴士民同心捍衛以免於危區區率作之誠重資眾力興舉盛典此亦知人心風俗無時無地不可有爲所願後之君子毋廢盛事以時宣
上恩德達下民之情而淫昏之殘燄姦蠹之藪澤尤當監於既往懲毖其方來俾無復敢逞以爲民害庶幾訟獄漸止災禍不作敬承休命於有永也是役也計用工資二千餘緡夏生任其半而一灑等力成之出納井然又籍入五通祠田產租息爲歲修之用其詳具刊於碑陰董其事者知縣福瑞訓導周之燦典史朱克敬邑人

則黃一澧黃元齡鍾必瑚龍袞黃元復劉沛黃模本黃榮本鄭秉彝饒榆齡實始終之例得埶書

龍山陣亡義勇並死難士民婦女記

咸豐十一年春予來守溪州是秋黔寇踞來鳳遂圍龍山冬粵西賊繼至當事者檄援兵萬餘先後半載始驅賊遁走蜀龍民之所以被焚掠者亟謀所以撫之又念城內外十六里多以鄉兵擊賊或戰不克而死其他士民婦女遇賊不屈者所在多有予既不能先事弭變忍聽其湮沒不彰乎因屬黃君元齡職採訪之役元齡篤

龍山縣志

卷之十六

文

十六

行而能任事闡幽表微嗜義若渴其天性也越七月始哀集諸死者姓氏具牘請

旌復乞予一言爲記予喟然曰自粵寇發難蔓延楚皖吳越所過名城大都號爲貴宮巨室者相率走避以委賊而偏陬下邑之民往往保衛鄉里至躬蹈白刃而不悔其捐驅遂志義不受辱見之匹夫匹婦尤多蓋

國家深仁厚澤淪浹乎人心既久又生長僻陋隘於見聞而拙於趨避反毅然爲達官巨室之所不能爲其勢然也龍山改流百有餘年官斯土者羣目以難治乃忠

義之氣節烈之行絕無所驅迫而然然後知世無不良之民而賊之不足平也決矣龍城之被圍也城中兵不滿三百賴元齡毀家募士激勵眾志故能轉危爲安今且慰諸死者於地下既詳且慎無濫無略於以激頽俗而明大義足爲士大夫居鄉者法矣抑予重有慨者當援軍未集時朱少尉克敬請率團丁數千從予勦來鳳賊會郡中繕守方亟且兵事別有主者竟不果克敬之得民也深所條議團練皆切近有實效使其言得行必不勞師糜財卒貽鄰患而此數十人者又何致膏血原

龍山縣志

卷之十六

文

十七

野若此哉予所謂誦國殤之篇輒累歔涕洟而不自已也同治九年閏八月朔記

龍山黃貞烈女誄

夫金石之行冰霜之操盡人難能屢見巾幗然使共牢備儀同穴矢志原頭松柏連理成枝山下靡蕪望夫化石亦其宜也若夫徵期甫納生死俱隔揆之恩義身殉尤難而老師宿儒尤復拘牽文義苛責無已吁其忍矣黃女名素秋龍山人幼慧父元齡教之讀每喜聞古今節烈事閒習吟咏發言蒼涼許字同邑晏鴻儀故戚也

無何晏中落元齡挈鴻儀塾課之昏有期而鴻儀沒草
童烏之元奇字頓絕撤嬰兒之瑱惡耗警傳維時刺耳
椎心死志已決然而口銜石闕身是女貞鬢髮淒涼飲
閨中之夜泣萊衣嬉戲戀堂上之春暉上大母晏太恭
人書略言之死靡他願視如孫男長侍朝夕復告嫂氏
張若成吾志吾願爲若終身役織紵情深烏哺聲惻猿
號后土皇天實聞斯語會傭媪有以譚語進者女也踐
摩笄之誓奮填海之誠血淚旋枯喘絲竟憊以咸豐九
年二月二十四日絕粒卒距鴻儀五十七日年二十有

龍山縣志

卷之十六

文

十八

一傷哉劉生沛書其事有云是時悲風颯颯四壁起燈
慘綠無光梨花錯落撲窗紗如雨雪春日凜寒生秋氣
也善狀斯境無以易之予稔元齡先世夙以孝弟任卹
著元齡敦氣誼捍危難大有造於鄉人而女所爲卓卓
如此益嘆天之報施善人必畀以重且大者彼世俗所
謂勢位富厚直謂逆旅之寄也夫崇尚風節闡揚潛隱
守土者責也矧蠻俗汶昧尤恃此疾風之草長夜之燭
乎爰爲之誄以勸來者辭曰

伊淑媛之挺生兮馥流聲於華閥羌習禮而明詩兮蕙

之心與蘭之質締朱陳之舊戚兮申一諾而千金聳宛
宛以玉潔兮啖右軍之牛心爛三星之在天兮巫陽忽
降乎庭戶秘函聞以逕達兮慘幽閨而淚瀉昕毀妝而
啜泣兮夕皋復以噤聲愧光儀之未奉兮徒矢言於他
生伴從君而陟九淵兮眷重闈以菀結抒衷忱而命楮
兮慘杜鵑之啼血列諸孫以承歡兮復呼嫂而誓所終
也訝羣言之噂沓兮將劫予以強從也乞彼蒼之玉成
兮二豎翩然其來下絕古井之波瀾兮雖隕身亦何所
苦白日黯而欲暮兮驂玉虬以上征或悼痛於短折兮
龍山縣志

卷之十六

文

十九

予獨慨乎彭殤嗟舉世而爲長樂兮每覩顏於二姓微
斯人之獨完兮曷爭衡乎時命彼微官之抗節兮尙齟
齟於僉人忠烈其無異致兮惟正氣之常伸緬芳範之
猶存兮願珥彤而揚貞懿抱死綏之夙心兮顧鬢眉而
自愧莽荆榛於宇宙兮惜荃蓀之委芳和山鬼之長嘯
兮紛涕淚以浪浪

泰平山記

黃一清

邑處萬山中岌巖犖巒莫可名狀城北三十里孤峰屹
立高出羣山上有浮屠居停而爲耽奇選勝者之所必

至厥名泰平山河流自東來繞其背北行折而西適當其右百步外復南行焉山之左壁立千仞下臨無極不可逼視前面危徑一綫僅容一人往還登者仰窺下注無人乃手扱足登面壁梯上膽氣稍歉者往往中途退縮山僧於巖隙插柳蒔竹柯葉左右扶若令人知有游覽之樂而忘步履之險也詢諸父老云嘉慶丙辰歲白匪倡逆聚眾十餘萬據來鳳城逼龍山竄擾附近之鑼鼓壇先是里人聞警徙家山頂山半架木懸石分居要隘遠近鎗礮聲相接賊驚逃至是不敢復窺我境山之

龍山縣志

卷之十六

文

二十

得名職斯故維時野菊香濃楓葉微酡余方與二三吟客攜奚童尋詩於落帽山下乘興至其巔訪開士譚無碍禪少焉夕陽啣山陰雲四合秋爽襲眉宇信步廊簷遙望橫崗隆起雉堞如鱗則縣城也隱與斯山相犄角循階周視得小渠闊十步深八尺老僧云春夏雨多足供挹注至秋則負匏汲河水灌注汲一日僅供三日用嘻抑憊甚旋見山陰巉巖若起若伏造物蓋畱此屯蒙以待識微者之拓闢鄉人抑嘗有未雨綢繆之意乎當此四方敕甯年穀順成倘能鳩工相度芟刈翳朽疏決

土石掘井開渠涸者盈滯者行更於廟之陋者飭之基之窪且齧者築之砌之增以飛閣重簷一旦有警鄉父老子弟棲止裕如壯者執戈矛保固閭里扞衛縣城豈不懿歟斯時也羣賢賦詩紀盛次第畢就余亦匆匆趨歸述敘情事郵帖僧壁後有游者當不以予言爲謬云

上永順府籌建堡砦並練團事宜狀

皋蘭人 前典史 朱克敬 號香

某既奉委築堡練團各事宜旋即會同黃州判元齡饒生維煜親赴近邊各鄉周歷相度並悉心諮訪本地紳

龍山縣志

卷之十六 文

二十一

耆查龍山東北兩路由王官嘴畫角洞以至百福司百餘里皆與湖北之宣恩來鳳交界更迤而西由二梭明溪以至魯碧潭百餘里皆與四川之酉陽秀山交界其間綿亘二百餘里地勢稍爲平衍卽去年來鳳之賊所出沒者也其他皆山勢險峻路徑崎嶇若能沿邊盡建礮牆則非特龍邑有長城之恃卽全局可無西顧之憂第境界彌曠工費太繁既無從籌措而民居散遠戍守尤難某等公同酌議擬於近河一帶修建礮牆其餘則勸令民間各擇要隘築砦聚居或百餘家爲一砦或數

百家爲一砦其砦堅樹木柵實土爲牆牆外有濠一如營壘之法牆內各建房屋倉廩險處更兼設卡砦各有樓以備瞭望家各練丁以備擊衝無事則散而耕有事則聚而守賊或犯境而旁無所掠進不能攻其勢必難持久卽如去歲賊踞來鳳時龍邑鄉間如太平山梁家寨等處皆築砦自守賊屢次環攻卒不得逞而去此其明效大驗也且查湖北邊界由施南宣恩來鳳而南者必行于龍山境內百餘里而後可以之他使各里皆築堡砦則所至皆堅城所至皆曠野雖有至悍之賊必不

龍山縣志

卷之十六

文

二十二

能枵腹而行百餘里以犯他邑之境加以東南各鄉處處皆鳥道羊腸其間如龍頭崖洛他崖茨崖塘九拐子等處爲永順保靖永定必由之路尤奇險天成數十人登高而守則百萬之眾無所用之南可以蔽辰沅東可以顧常澧其所全者固甚大也又龍邑向有團練之設而去歲仍受蹂躪者蓋山居寫遠人戶畸零一團之內往返十餘里之遙百姓苦於奔走平時旣不能按期操演臨事又不能互相救援一旦有警仍復四散奔走坐聽賊之焚掠今旣築砦聚居則其眾將不約自齊而妻

孥輜重米糧牲畜悉萃其中其心有所繫戀則必無渙散之虞其力有所憑依則守之固砦成之後卽以一砦爲一團擇公正紳士爲之總平時則良莠易於稽查臨事則戰守不煩徵調是保砦行而團練亦舉也然團練之法則又有進龍邑僻處山隅去省千有餘里去鎮筭永綏兵多之處亦數百里每遇有警請兵請餉往返動經月餘臨事而求援旣苦於鞭長莫及無事而養勇又苦於糜餉不貲倉卒之際非團練不爲功而練之無方則鄉民能守而不能戰能勝而不能敗經費不裕則臨

事籌畫尤難意謂必於團練之中兼寓選鋒之義於經費之外更籌不時之需如平日無事先於近城十里以內擇團丁之精壯者數百人陰以兵法部勒月加訓練俾皆知坐作進退之方金鼓旌旗之節而又時時告之以忠義勵之以同仇優者賞不率者罰明示章程應用經費則分上中下三等均攤上戶每日出錢十文中戶六文下戶三文貧無業者免犒賞之外以時添置軍裝其餘則存於殷實之家以備不時之用官但爲之稽察並不絲毫挪借或遇有事卽以此項照勇墊發月餉而

部伍號令習之有常器械旗幟犁然具備朝下令而夕成軍較之臨時招募者所得實多而散卽歸農亦可無意外之慮如是則行之近城而有效卽可推行於各鄉各鄉皆行則一縣之內不啻常蓄精兵數千非特入守城垣出防要隘足以備豫不虞卽鄰封小有警動亦可就近赴援有堡砦以爲之基有團練以爲之用不戰而困賊無餉而添兵數年之後卽有巨寇臨境亦可不必請兵爲邊防久長計無有善於此者矣而或謂在大兵之後宜與民休息不可妄事更張也夫當無事之時而

驟爲此議則百姓將皇然而疑今自經亂以來百姓受賊荼毒慘不可言各有懼而思戒之心因機利導正其時矣又有謂有治人而無治法言之易而行之難軍興以來議堡砦團練者十年矣而究之空言者多實效者少夫是以知其難也是言也某甚疑之今夫定天下之安危絕萬世之利弊非其人而莫屬者有之矣若夫一州一縣之事盡心力而爲之雖中人之才亦能濟事若徒因循粉飾奉爲具文則天下將無可爲之事而何有於堡砦團練也某等再三駁議覺以上二事皆尙可行

現在黃元齡已於五老峯雞公寨等處首先創捐買地築立砦基並照李前令保甲舊章選丁備練更得憲台開誠布公親爲督率某等分赴各鄉協同本處紳耆認真辦理果能假以便宜寬以歲月行之三年必期有效如其不成卽治某等以大言欺罔之罪

正南埧興復社倉舉行保甲恭祀

徽國文公朱子於文昌閣以前明王文成公劉中介公本朝于清端公陳文恭公配告文

黃元齡

惟神靈鍾白嶽秀挹紫陽承絕學於五季之衰揭眞詮

龍山縣志

卷之十六

文

二十五

於二程之教蓬廬風雨讀書而便以聖賢自期臺閣經綸得志而不負平生所學望京華於北斗哀鴻上東浙之書沛霖雨於南庸涸魴吸西江之水洞天曾栖夫白鹿何妨隱處卅年黎元久困夫青苗幸有社倉一舉以實心而行實政頗勞慘淡經營以治法而任治人端賴門生故舊蠅頭微利聊權八口之家菜色浮青不上三農之面此固宜文臣儒士莫不尊親萬世千秋奉爲矩矱者也然社倉已定其規模保甲實與相經緯欲準今以酌古在保富以安貧

文成繕牌式十家尙慎旃乎父老子弟

忠介著鄉書一冊願無卽於匪彝悞淫沿至開國以來
偉人崛起一則以東山逆地團居不損一丁一則以西
蜀蠻鄉嚙匪難逃十甲循井田之遺制望衡卽可備聲
援寓兵政於農功秉耒亦堪資捍衛花村月滿籓籬無
吠怪之龙野徑雲堆暮夜無追呼之吏而如是夫閭閻
安堵矣而如是夫朝野清平矣之四公者固皆讀先生
之書行先生之學故規模宏遠遵先生之所已爲者不
嫌拘而經緯纏綿肇先生所不及爲者不嫌創撫雲山

龍山縣志

卷之十六

文

二十六

之曠渺天各一方念俎豆之苾芬感切百世矣元齡等
讀書稽古論世知人先於庚子之秋曾修鄉社之政嚮
仁慕義秉彝原自同生春放秋收立法未嘗不善乃情
殷景仰靡不有初而德尙圓通難乎爲繼十年流水悵
瓦裂之堪悲一帶人烟嘆餅成之若畫維予小子大有
同人運集狐成裘之功作亡羊補牢之計因時因地權
且變通以宜民克儉克勤聊將耕桑以報國仰神明於
千載興起聞風聚精爽於一堂成之不日洋洋如在常
振風化於

聖朝赫赫難名永維人心於終古伏冀風清綠野廛園
銷劒戟之光露湛黃雲億兆食和平之福儿筵式設來
監於茲棟宇更張請俟他日請以某公配尙饗

旌表節孝聶母黃孺人傳

侯官 林逢年

節母黃孺人沙坪處士聶公善元妻吾友他砂文學金
聲公長女優行生瑞亭女兒也性柔孝慈仁習姆教逮
事孀姑鍾能得其歡心鄉里咸稱之姑老困於病左右
湯藥四五年無稍懈姑病時夫亦得咯血疾朝夕兩顧
形神忘悴及篤顛天號哭祈以身代哀動途人姑沒夫

龍山縣志

卷之十六 文

二十七

亦尋殞遺孤二長近知才三歲次近仁僅一歲孺人痛
不欲生慟絕復甦者數既無可如何又念其地少文人
不足以訓子乃徙居他砂依外家處風雨一燈雙哇對
泣稍長卽延師課之讀家雖儉束脩供奉必極意卽鄉
里孤苦無告者有求靡不委曲以應不少吝今子俱成
立男女孫井井近知治家里稱孝友近仁已食餼貢明
經猶志學不倦其成難量天之憐苦節國家之所以表
而揚之蓋尤有在哉近仁前歲遠道施州從予遊去正
主其家將半月晨夕金翁父子得其詳然觀金翁一家

與近仁兄弟足以知孺人矣妾陳熟其內云孺人荆釵
織紵老而猶勤稍閒卽造父母所閒談時事博老人歡
又聞孺人夫兄某誘於賭博家漸落孺人累哀告姆轉
勸夫兄感悟痛改家復以振嚴憚之至今有女娣爲余
來鳳門徒周蔚玠母早寡苦志食貧蔚玠亦循謹勤讀
噫皆足以風也

書林逢年聶母黃孺人節孝傳後

長沙

陳本欽

龍邑廩生聶近仁號力齋因余徒黃生元齡爲介來謁
並質文於余接其人議論風生文雅無俗態閱其文悉

龍山縣志

卷之十六

文

二十八

有法度可觀知淵源必有自矣閱日力齋攜卷八軸來
浼余書伊母節孝傳係伊師前進士林澤夫先生所撰
也反覆數四如親見孺人之家世終身及至孝苦節不
禁油然而敬因嘆孺人之節孝得名賢之筆其傳更遠
且久益嘆力齋之學得其傳余與澤夫未一謀面但澤
夫第進士時余已聞文名躁甚宰通城時余又聞政績
循甚及余主城南書院講不相聞者久而不意其卽去
官而絮飄於龍山也龍邑於吾楚僻處南隅其士人來
肄業書院者悉才華有餘根柢不足今得名賢流寓□

地以指授之學務其實文風臻臻日上都人士罔不雲
蒸而龍變豈獨孺人之節孝益藉以傳之幸哉又聞黃
生云澤夫著作積青箱者八千餘紙未出問世然見一
斑已窺全豹知他日傳之其人不終藏之名山也書傳
竟軸尾略書梗概以誌向慕

鐵爐坡

舟徒人
前知縣嚴學淦號麗生

一山化爲千萬石一石化爲千萬雲雲英不飛立積鐵
鐵花朵朵飄繽紛我行石隙中疑蹋浪墨走以杖觸之
鏗有聲又訝堅如鐵城陡飛泉百道貫虹來萬谷笙鐘
懸石紐柳州西山記昌黎南山詩筆所不到心寫之但
覺胸中邛壑何恢奇變幻祇有天公知

大雨後上龍頭岩

飛泉百道如雷聲穿雲破綠山爭鳴山中泉洗雲外石
五色石光鱗甲明東雲西雲出復沒閃閃蟠雲眞不測
龍山縣志

卷之十六 詩

一

天嬌如龍不見龍一枝尺木橫空立回頭忽幻雙角丫
插天高聳分槎枒育風怪雨驅不得吞吐日月空中拏
我騎龍背乘風走絕頂乘來見龍首披拂青髯頷下垂
龍鍾變作支離叟

賈家寨山行

木葉塞空團古青日色不到風泠泠萬仞山無插腳處
俯視忽訝光瓏玲石穴洞開如廣廈倒射天光出其下
隔山山影稍移來滿地山痕綠如瀉

獅子頭歌

鬢雲蟠蟠湧大千，
鬚如斗青鬣，
蜷憨騰不作踞地吼。
哆口吞吐空中天，
獅頭昂如龍，
獅足兀如鐵，
聳身日月戲雙丸，
疾捲長風修尾掣，
佛力馭之定可騎，
老羆蒼兕同皈依，
心兵將之亦可戰，
鬼母天魔齊色變，
胡爲棄之在西郵，
屹立不動蹲如癡，
蹒跚肉鼻輸馴象，
猶有天閑入貢時，
是獅非獅問不語，
躍冶洪爐鍊鋼土，
畫工安得陸探微，
拓取精神畱萬古。

三十六灣觀水

不成瀑布不淵泉，
側出斜飛地脈穿，
乳巖夫人五百道。

龍山縣志

卷之十六 詩

二

天龍本事野狐禪

拍卜頭山行口占

竹色青如海，
雲峯綠到天，
蘿衣三徑襲，
花霧一房圓，
醒雨聞啼鳥，
梳風響亂泉，
會心琴筑外，
清籟自泠然。
掛壁山窗小，
栖霞日影幽，
春餘花晚放，
樹密水藏流，
古路羣陰合，
高天眾壑收，
僧巢安一角，
雲氣湧層樓。

宿招頭寨太平寺

心太平爲貴，
安禪此上方，
軟紅飛下界，
萬綠擁空王，
石氣收殘雨，
鐘聲定夕陽，
深山畱古刹，
僧臘幾滄桑。

朵羅坪

幾點飄黃雪山頭古桂陰風香有花氣秋綠淡春心擬
捉張璣塵來捶柳惲琴流泉明月下低按水龍吟

金線壺

夕照畱金線壺中到九華松陰千萬疊竹徑兩三家淡
對前峯月濃收滿塢花班春邀白叟閒憩語桑麻

陽雀坡

拔地數千仞生雲幾萬重欲飛山有翼陡折路無蹤踏
石驚騎虎攀藤險馭龍篠驂雙縷縛倒挂碧芙蓉

龍山縣志

卷之十六 詩

三

招頭寨道中

春陰乍展有餘妍輕暖輕寒二月天香撲晴帘浮綠蟻
犁翻宿雨叱烏犍迎人山送螺鬟笑悟我花參蝶夢圓
閒看兒童拏線手升沈無定戲風鳶

送曉樓之都

赴時以選貢朝考

潑浦翰林

舒夢齡

號橋蘇

八年飄泊客龍山眼中誰是王子安文章詞賦盡工絕
傲骨峻嶒生秋寒山窗風月與酣飲彼此結隊俱少年
我重君才君愛我願效雲龍飛九天我懷同居無君遇
君已翱翔我如故江湖朝夜夢

帝鄉惜我不得隨君去君去

京華意氣豪塵沙萬里仗寶刀一葦飛渡黃河水雙眸
橫睨泰山高況復

天子詔求賢厥貢惟璆琳琅玕風雲際合趁此舉記取
司馬題昇仙長安冠蓋紛馳驅薦衡豈無孔融如丈夫
會應有知己慎勿輕上宰相書

過龍頭岩

劉文達

擁簇羣巒起蟠盤窄徑由市廛沈釜底車馬轉矛頭樹
隙元潭復崖窪古雪畱窟深藏蝮蝎藤老挂獼猴履蹴

龍山縣志

卷之十六 詩

四

苔痕滑衣披石角鉤茶香聞野店鐘韻指僧樓碖束風
棱射碣崇日御適昔年流寇擾此地伏戎搜扼塞資長
策當闕鎮小侯燔烽青戍堡戰骨沒荒邛往事雲烟過
深山黍稌秋承平無險阻吟眺自夷猶

東門外忽遇鐵卿竹吾口占一律

來鳳王煜號曉
拔貢樓

二子與我別及今纔五宵聯牀情未倦彈鋏興偏饒城
闕雙鳧至天空一雁遙匆匆通數語不覺已魂銷

宿芭蕉垞

長短亭前路未休征鴻又有稻梁謀久貧難免妻孥累
不善將貽父母羞餐到菊花媿騷客神依蕉水怯山郵
披衣茅屋看明月一夜離情兩地愁

龍山道中感作

莊生出語太荒唐三月何曾能聚糧千里繁霜欺鬢短
一肩行李怯途長眼前北郭貧難說輿上南柯醒卽忘
落日浮雲增感慨詎能負米報高堂

別隆頭陳榕亭

太邛眞令德不愧秀才科說在劉公幹湘南吏隱多造

龍山縣志

卷之十六 詩

五

門識蘭桂倒屣出煙蘿酒罷卽揮手聽儂彈鋏歌

鍾英塔

晏良冕

是何葱鬱氣佳哉毓秀鍾靈金碧堆如此文章眞拔地
迄今崖谷合生才破空飛鳥拂雲去爭上游魚捲浪來
我欲題名招等輩臨風浩嘆足徘徊

過龍頭岩

黃一清

下視更無極臨淵鳥怯飛林荒人迹少山複日光微出
險魂猶悸回頭路恐非倚藤耽野景晴雪滿征衣

鐵爐坡

陰陽鍛鍊此洪爐譎詭乾坤古奧區深箐畫迷雲氣黑
巖巖晴漱水聲麤人如磨螳盤山出猿護繡獠向客呼
如此邊關天塹險笑看士女醉村酤

暮春之初二梭道中卽事

李登岸

鎮日山中帶雨馳參差村郭傍清漪過橋花影忽橫水
入竹書聲又出籬少婦採薪如採茗老翁憐犢似憐兒
勞人草草行官道別有驚心聽子規

淡烟深鎖隱樓居蕭寺鐘聲隔石渠山鳥啄林新雨後
野花繪壁暮春初評量風景添詩料指點巒光寄興餘

龍山縣志

卷之十六 詩

六

漫說輕航天上坐本來吾道是舟虛

秋闈報罷送春海歸里

黃元齡

桐陰落葉暮寒生客裏風霜太不情一幅壯懷消未得
隔江秋老夜猿聲

年來蹤跡若飄萍聚散無端湘水濱秋雨秋風送君去
長沙猶有未歸人

故山千里白雲遮珍重琴書惜歲華詩思一番增眷戀
昨宵有夢到梅花

秋波催送楚江船指點鄉園夕照邊若過蓬廬親有問

憑君爲我慰纏綿

望鄉臺觀瀑

黃本榕

石林鐘磬隔溪聞
卅六灣前對夕曛
行到亂巖高聳處
飛泉流出萬重雲

紅巖堡

一溪流水碧潺湲
圍着人家八九間
十里夕陽回首處
青青猶是故鄉山

宿貓兒洞

屋小堪容膝
籃輿此暫停
雲堆千嶂黑
風閃一燈青
聒

龍山縣志

卷之十六 詩

七

聒村人話勞勞
旅客形夜闌
眠不穩
流水隔窗聽

他砂道中

張修府

野桃花笑杜鵑
嘯客路濃春送馬
蹄細柳輕烟寒
食後亂山古驛夜
郎西水田積雨千
畦闊石磴盤雲萬
嶂低墟里蕭條餘
故壘晚來凝望一
淒迷

木鳴行

鬼火煙青蠻霧黑
老木陰森作人立
空山風雨愁呻吟
瘦猿孤嘯怪鴟泣
或言下有陳死人
魂歸宰樹千年春
又疑木客解吟趣
把臂山魑夜深語
晉石能言毫鳥鳴

反常爲妖理則平窮鄉兵燹莽殘劫嗷嗷如助哀鴻聲
俗耳驚疑縱尋斧爨下勞薪行及汝木兮木兮慎勿聲
勁節堅心自終古

野人獻雉感賦

慙愧中牟政桑間有異禽重煩修士贄難慰野人忱
繳逃無地文明晦已深春風聽朝雉中澤和哀音

茅坪道中

歲晚猶于役危途徧不毛雪光連霧白山勢挾天高廢
壘饑烏集空林餓虎嚎流亡殊未已何計息民勞

龍山縣志

卷之十六 詩

八

夜行洛塔巖

朱克敬

攬轡隨飛檄宵征敢告勞草枯熒焰大月黑虎聲高仄
徑愁良馬危途仗寶刀所嗟奔命亟誰與賦同袍

里耶途中感懷

勞生無暫休登途及長夏危峯阻攀躋峻岨愁上下風
迴汗成霖日赤肌如炙攬轡氣慷慨沈思忽嚶嗷邊民
歲荷戈天災復難赦烽火照層巒炊煙絕村舍况茲伏
莽興草木增驚詫談兵多趙括求治無黃霸願言芻牧
心此責何由卸對食不能餐熱淚迎風瀉

里耶示紳民

昊天降鞠凶窮黎墮洪阨三年驚寇盜兩載無禾麥哀
哀菜色徒忍饑猶荷戟禦災古有常吏任非民責爾口
雖不言我顏固先赤虛詞多慰勞瘡痍究何益李侯去
已遠張公亦陳迹荒涼德政碑寂寞籌邊策凡才百不
如況乃轅駒踏瞻烏渺所依匪兇悲何適相對更茫茫
按劒空鳴嗑

登八面山

壯心千里久蹉跎倦眼憑高喚奈何大澤龍蛇藏霧密
龍山縣志

卷之十六 詩

九

深山禾黍得天多乘時據險空希範垂老平蠻幾伏波
指點西南形勝處亂雲如幕獨橫戈

登鐵爐坡

鍾盛琛

一峯高而尖一峯危而側千峯萬峯飛舞來隨勢變幻
眞奇絕鐵爐一壁倚天起劈空噴出三峽水一線羊腸
彎復環行人裹入亂山裏山中亂石橫太古豎者若人
臥若虎橫空雲霧掃不開但聽輿夫唱邪許百丈以上
鳥飛去千丈以上煙橫樹登高回頭注眼窺純是死生
呼吸處山班班雲漫漫天風鏘鳴如龍鸞我當御風絕

跡直作人世之飛仙

游佛潭題壁

閱世蒼茫抱杞憂
偷身偶到上方游
虛岩滴溜晴疑雨
古木搖風夏似秋
好水好山都入畫
無花無酒獨登樓
憑高不盡興
衰感南望鍾吾涕泗流

鍾英塔落成黃井門丈命以東坡詠雪韻題之

饒琪

天外孤撐玉笋纖
修成七級倍莊嚴
深紅石鑿吳山骨
淨白灰敷蜀井鹽
賴有層梯通上界
全空四壁走飛簷

龍山縣志

卷之十六 詩

十

軒軒無限凌雲志
比是浮屠更合尖

塗壁何堪亂點鴉
幾層欲上想飛車
胸中塊壘消無跡
眼底煙雲眩不花
奎宿祇今占甲第
慈恩何處拜詩家
出籠入洞猶貽誚
漫詡吟成手八叉

南溪竹枝詞 十二首錄六

饒瓚

保甲聯名舉社倉
相期風化紀循良
稻花臨水柴門靜
時有書聲出柳堂

豆花開後菜花香
大麥青青小麥黃
野菜和根糝粥煮
貧家供抵半年糧

茅屋三椽短短垣紫微花下竹籬門一家孝友無餘業
既飯雞豚又灌園
土脈乾枯費汲泉男耕女織夜遲眠年年歲晚農功歇
破網灘頭打水棉
桑麻地隙種黃柑三寸霜紅勝海南地窖積藏似初摘
新春相饋滿筠籃
村居儉嗇存遺俗贏得倉箱穀有餘蕎子多收紅薯賤
家人懽語飼年豬

施粥行

張廷輝

龍山縣志

卷之十六 詩

十一

天降凶災安可當老弱呼號情皇皇倉庾匱乏穀難糶
况乃無錢愁空囊傷哉我心時惻惻蒿日艱難救不得
昔曾讀禮至檀弓黔敖往事差可則當路設廠日煮粥
風香吹迸雪膏流敢云救荒彌天憾聊爲鄉里朝夕謀
時維五月天炎暑大啟重門招爾汝鳩形鵠面紛紛來
一杯瓊糜特授與强者鷹攫尙精神弱者鴟蹲殊逡巡
往來各欲延殘喘何論遐方與近鄰持瓢舉鉢復攜缶
日見數百環門首我本力薄謀不週爾腹未飽我顏忸
此去秋穫時非遙祈天雨順兼風調多稼連雲倉箱滿

庶免鴻鴈歌嗷嗷

涉水謠

經汝池河作

溪之水兮其石鑿鑿
徒步而涉兮石悍波惡
我不涉兮山路峻嶒
我將涉兮石齧我腳
我涉而嘆神禹兮治功
斯略涉兮涉兮魚腹
非我處兮河伯毋我虐

亡弟警堂入祀忠義祠感賦

鍾大俊

北邙山下路難通
翦紙招魂一望中
琴曲久隨流水渺
劍光時照夜燈紅
酬

恩豈必當官守
殺賊猶應作鬼雄
記得昔年悵分襪
聯

龍山縣志

卷之十六 詩

十二

牀疎雨響梧桐

萬壽行宮落成恭紀次張東墅觀察韻

鍾 浥

薄海微臣悵野居
瓊宮欣遇落成初
清晨雲日天顏霽
邊徼冠裳土俗除
拜舞誠應通

帝座觀瞻禮亦肅
鄉閭何時介壽趨
丹陛聯步駕行侍
錦裾

田烈女

慈利人 前訓導 朱先敏 字恂 叔

北山有鳩南山有鵲
鵲巢將成焚巢風惡
鳩呱呱啼且

躍泉下于飛良足樂一解田氏女楊氏婦女也奚婦之

有命自我父母女聞之久二解况同功之蠶製香纓矣

共命之鳥繡鞶囊矣噉噉之鴈飛且鳴矣計日待郎相

迎郎胡不待九京先我行三解病耗纏綿女心憂煎死

耗載傳女呼爺號天請必歸男氏成禮柩前爺曰胡可

苟難須余往觀女收涕不言四解阿爺歸止女不見矣

叩門呼女如隔潺湲黃河水奔喪阿爺主之可自主者

唯一死五解時同治九年上半年龍山女子田梅英

未嫁夫死殉以身隔一日從千齡饒生啟事徧徵詩文

龍山縣志

卷之十六詩

十三

司訓作歌敢告後人六解